

**Nunatsinni namminersorneq pillugu inatsit qanoq nutarterneqarsinnaanera ullutsinnut naleqqussarlugu apeqquteqaat aallaavigalugu siunnersuut.**

(Inatsisartunut ilaasortaq, Aqqalu C. Jerimiassen, Atassut)

**Akissuteqaat**

(Naalakkersuisut Siulittaasuat)

**Siullermeerneqarnera**

Qujanaq Inatsisartunut ilaasortaq Aqqalu C. Jerimiassen, Atassut, oqallinnissamut siunnersuummut matumunnga Naalakkersuisut ilassilluagaannut.

Namminersorneq pillugu inatsit nutarterneqartariaqartoq, aamma inatsit toqqammaviatigut ajunggikkaluarpalluunniit, siunnersuuteqartup aallarniutigalugu oqaatigaa. Taamatutaaq oqartussaaffiit annertusarneqarnissaat pillugu danskit naalagaaffiannut isumaqatiginninniarnissaq pisariaqartinneqartoq, Demokraatit, Inuit Ataqatigiit kiisalu Atassutip naalakkersuisooqatigiinnissamut isumaqatigiissutaanni tikkuarneqarpoq.

Oqartussaanerup annertunerulersinnissaanik, allanillu inatsisip atuuttup killissaasa iluanni pitsanngorsaarnernik angusaqarsinnaalersitsinera, inatsisip nukittuffiiniippoq. Suliassa qarfinnik amerlanerusunik akisussaaffigilerlugit tigusinertigut kiisalu politikikkut aningaasaqarnikkullu isumaqatigiissutit, paaseqatigiilluni Danmarkimut ingerlaavartumik isumaqatigiissutigineqartartut, tunngavigalugit iluaqutissartaasut taamaattut anguneqarsinnaapput.

Ukiuni kingullerni danskit naalakkersuisuisa oqaloqatigisarnerat pitsanngoriarsimasoq Naalakkersuisut malugisimavaat. Tamanna sinaakkutissatut isumaqatigiissuteqarnermik kiisalu arlalinnik ataasiakkaanik pingaarutilinnik isumaqatigiissuteqarnermik kinguneqarsimavoq, tassani nunatsinni maani annertuunik aningaasaliinissamut danskit naalakkersuisui ukiunut tulliuuttunut pisussaaffeqalersimallutik. Aningaasaliinerit inuiaqatigiinni suliassa qarfinnut agguataarneqarput, soorlu peqqinnissaqarfimmut, illersornissamut, politiinut, pinerluttunik isumaginnittoqarfimmut, nukissiornermut kiisalu angallanermi attaveqaasersuutinut.

Aammattaaq EU Kalaallit Nunaanni aningaasaliissutini malunnaatilimmik qaffanniarlugit aalajangersimavoq. Tamakku inuiaqatigiinnut pitsanngorsaarnernit tigussaassut aamma Kalaallit Nunaata nunamut EU-mi ilaasortaasumut nunasiaataasimasutut inissisimaneratigut aammalu naalagaaffiup ilaaniittut akornanni suleqatigiinnerup pitsanngorsarneratigut, anguneqarsimapput.

Suliassa qarfiit tiguneqartut Kalaallit Nunaata nammeneq pisariaqartitai malillugit aqqissuussaanaissaasa aningaasalersorneqarnissaasalu qulakkeernissaa, Naalakkersuisunit siunertarineqarpoq. Nunanut allanut, illersornissamut sillimaniarnermullu tunngasut eqqarsaatigalugit maannakkut ineriartornerup ingerlasup attatiinnarnissaa, Naalakkersuisut kissaatigaa, tassani nunanik tamalaanik suleqateqarneq eqqarsaatigalugu, Kalaallit Nunaata isumaliutersuutini, aalajangiinerni suliniutinilu akuutinneqarnera annertusiartuaassalluni.

Kalaallit Nunaata nunani tamalaani nammineerluni saqqumisarnini aallartitaqartarninilu annertusitinniarlugu kissaatigippagu, suliassaqarfimmi aningaasaliisernerit ingerlaannarnissaat pisariaqarpoq.

Innuttaasunik taasititsinikkut namminersornerup eqqunneqarnissaa inuiaat kalaallit toqqarsimammassuk, naggasiullugu eqqaamaqqussavara. Taamaattumik Naalakkersuisut isumaqarput, namminersornermut inatsit allanngortinneqassappat inatsimilluunniit allamik taarserneqassappat, inuiaat kalaallit suliap ingerlanerani akuutinneqassasut.

Taamatut oqaaseqarlutik Naalakkersuit pissanganartumik pilersitsiviulluartumillu oqallinnissamut qilanaarput.